

संघर्षशील नारी शकुंतला

सत्यपाल 'श्रीवत्स'

शकुंतला, तू किन्नी म्हान नारी ही। भारती इतिहास दे जिस ध्या च तेरा अमर चित्रण ऐ, ओह् म्हेशां-म्हेशां आस्तै अमर होई गेदा ऐ। तू महाकवि कालिदास गी अमर गै नेई कीत्ता, बल्के उस्सी विश्व कवि दी उपाधि दे कन्नै बी विभूशत कीत्ता। संस्कृत भाशा ते भारती संस्कृति गी विदेशें च पजाने च तेरा बड़ा गै सराहने जोग जोगदान ऐ। तू जर्मन-कवि गेटे दी भावना गी बी प्रभावत ते अंदोलत कित्ता, जिस मूजब उन्न भाव-बिह्वल होइयै, तेरी प्रशंसा च अपनी कवता राहें गीत गाया। सच्च-मुच्च तू किन्नो म्हान ते किन्नी आदर्श नारी ऐ। तू अपने पुत्र भरत गी ने'आ नां दित्ता जेह्ड़ा सारे देसै दा नां 'भारत' बनियै मशहूर होई गेआ।

तू धरती ते सुर्ग दा नाता जोडने च सराहता-जोग कड़ी दा कम्म कीत्ता। तेरा पिता धरती दा माह्नु रिशी विश्वामित्र ते मां सुर्गे दी बे मसाल सुन्दरी अप्सरा मेनका; इन्द्र-सभा दी प्रमुख कलाकार। इक्क कठोर तपस्वी जीवन बताने आला दबंग रिशी ते इक्क कोमलांगना सुर्गे दी अप्सरा। किन्ना विरोधाभास ऐ? पर, इन्न गै तेरा अद्भुत निर्माण करनै च अपनी महत्त्वपूर्ण भूमिका बी नभाई ही। तू जम्मी ही विरोधाभासें दा मिला-जुलारूप लेइयै। प्रकृति दी सुंदरतम रचना ते सारिये चनौति ऐ दा जवाब देने आली निर्भीक ते वीर पुत्र 'भरत' दी मां ते निर्मात्री। किन्ना मधुर विरोधाभास ऐ एह् जेह्ड़ा अपनी मसाल अप्पू ऐ। संस्कृत-नाट्य-साहित्य दे इक्क होर अमर कलाकार भवभूति ने म्हान विभूतिये दे व्यक्तित्व दे बारे च किन्ने सुन्दर अक्खरें च ब्यान कित्ते दा ऐ "वज्रादपि कठोराणि मृदूनि कुसुमादपि। लोकोताराणां चेतांसि कोहि विज्ञातुमर्हति।" बड्डे ते लोकोत्तर (आम लोकें थमां उप्पर) लोकें दे दिल वज्र कोला बी कठोर ते फुल्लें कोला बी कोमल होदे न। तू इस कसौटी पर शत-प्रतिशत खरी उतरनी ऐ।

जिसलै तुगी अबोध अवस्था च, पैह्लें तेरी कठोर हिरदे आली मां ते भिरी पत्थर-दिल बब्ब छोड़ियै चली गे, उसलै तेरा कुंन सहारा हा। उसलै प्रकृति

दा दिल बी पिर्घली गेआ होग! ओह् बी तोबा-तोबा करी उट्टी होग—जिसी अस जड़ प्रकृति आखने-आं, उसलै ओ बी रोई पेई होग। उस बनै दे बेलां-बूटे ते पक्खर-पैछी बी करलाई उठे होडन। किन्ने नृशंस हे तेरे मां-प्यो जिन्हें गी सिर्फ जिनसी भूख ही। ओह् पूरी होई ते तुगी सुट्टियै लांह् बे होई गे। खैर, उसलै प्रकृति-देवी ने गै तुगी सहारा दित्ता ते तुगी अपनी बच्ची बनाई लेआ। कीजे तेरे सुंदर सन्हाकड़े रूप गी दिक्खियै, उसदा दिल पिर्घलेआ गै नेई हा, पर ओह् अपने सौंदर्य च किश कमी दिक्खियै तुगी अपनाइयै, पूरा करना चांह् दी ही। इयां उन्न तुगी 'गोद' लेई लेआ ते तेरे प्रेम च सराबोर होई गेई ही। एह् तेरा दूआ जन्म हा ते प्रकृति देवी तेरी पैह्ली धर्म मां ही। उसलै तुम्मी मुँहें च अपने पैरै दा डूठा पाइयै, उसदा समर्थन करी दित्ता होग। उसलै-लै कोल बगदी नदिया च कल्लोलों पांदे हैसैं दे जोड़े सोचेआ—एह् कमले दा फुल्ल धुप्पा च बी इन्ना कियां मुस्करा करदा ते साड़े कोला दूर यनी नदिया चा निकलियै, बाहूर कियां चली गेआ? भिरी केह् हा, ओह् डुआरो भरियै तेरे कोल आई दुके। पर, कोल आइयै उन्हे दिक्खेआ हा इक्क कोमलतम फुल्लै आंगू मुस्कांदा सोह्ना ते सन्हाकड़ा ज्याना, माह्नु दा ज्याना। ओह् बी बिद नेई हे झिजके। ओह् होर कोल आई दुके ते तेरे परसीने भरोचे दे पिंडे उप्पर अपने फंगें, दी छांओं करियै, चबक्खै बेई गे हे। तेरे धुप्पा च त्रैह दे मुँहें च उन्हे पानी दियां बूदां पाइयां ते तुगी फलें दा रस बी पलाना शुरु करी दित्ता हा। प्रकृति दे उन्हे दूतें अपनी सारी वत्सल-ममता कन्नै तुगी नुआहली दित्ता हा। हून तू उंदी धर्म-धी ही ते ओह् तेरे धर्म मां-प्यो। एह् तेरे दुए धर्म-माता-पिता साबत होए। एह् पक्की गल्ल ऐ जे ओह् दौंए हंस नर ते मादा हे, जिन्हें गी संतान दी ममता दा अभाव सताऽ करदा हा, पर कमाल ऐ उंदी ओह् ममता, जिन्न तुगी ठुकरादियै गी सहारा दित्ता, अपनापन दित्ता ते दित्ता हा बे-मसाल प्यार। एह् उंदी माह्नु दी स्वार्थपरती गी, खुल्ली चुनौती ते फटकार ही। पर, एह् ते हुन तुएं दस्सी सकनिये जे उस हैस-जोड़े ने तुगी किन्ना चिर तक अपना निश्छल वत्सल-प्यार देइयै पालेआ हा? जिसलै कुलपति रिशी कन्व अपने शिष्ये कन्नै नदिया च न्हौने गी जंदे होई, उस रस्तै लंग्ये तां बी ओह् पक्खरु तेरे मुंह् चूग देआ करदे हे। रिशी गी दिखदे सार गै ओह् बच्चे पक्खरु तुरता नै उडुरी गे हे जां त्राह् कन्नै जां खबरै अपने कर्तब्व दी इतिथी समझियै। शायद उंदी इन्नी गै ड्यूटी ही तेरे प्रति।

उसलै दयालु रिशी दा मन बी पिर्घली गेआ हा तुगी दिक्खियै—“मडो किन्ना सोह्ना ज्याणा ऐ कुसै दा? पर, इस्सी पक्खरु की पालारदे हे? एह् पक्खरुं दा बच्चा ऐ जां माह्नु दा? केह् फलौनी ऐ एह्? इयै-ने'ई मसाल पैह्लें कदें नेई दिक्खी। जेकर एह् माह्नु दा बच्चा ऐ, तां ओह् मां-प्यो जरूर कठोर ते पापी न, बे-दर्द न।”

इंयां रिशी ने तेरे मां-प्यो गी खूब बुरा-भला आविखयै, तुगी चक्की लेआ हा, अपनिया गोदा ते लाई लेआ हा अपने हिरदे कन्नै। ते तू उसलै बनी गई ही उसदे ममता भरे दिले दा टुकड़ा। उन्हें उसलै अपने हिरदे दी ओह् सारी ममता, जेह् डी केइयें ब'रें थमां अपने काल्पनक पुत्तर-धी आस्तै साह्म्बी-सम्हैली ते समेटियै रक्खी दी ही, तेरे उप्पर इक्कै बारी डो'ली ओड़ो ही, जिस कन्नै तू इक्कै बारी ब्रवकी-जन उठी ही। तेरे मुहें दा पैरै दा डूठा बाह् र निकली गोआ हा ते तू— 'उआं' करियै उआं गै रोई उठ्ठी ही जियां जम्मने दे तुरंत बाद इक्क ज्योणा बच्चा रोदा ऐ। ते इंयां तेरा इक्क होर जन्म ते दुए लफजें च सेही जन्म होआ हा। रिशी ने उसलै तुगी खरा ते माकूल नां दित्ता हा—'शकुन्तला' (शकुन्त = पक्खरुं, ल = पालना—पक्खरुं द्वारा पाली दी) इयै ने'आ प्रसंगानुकूल नां कुसै बिरले दा गै होंदा ऐ। ते इंयां रिशी कण्व कोल तू पुज्जियै अपने संघशशील जीवन दे चौथे पड़ां च पुज्जी गई ही। असली फुल्ल ओह् जेह् डा कडें बिच्च खिड़ै ते भिरी बी अपनी खुशबो गै बिखेरै चक्खी। कमल चिक्कड़ै चा गै सिर कडिइयै पंकज खुआंदा ते सारें दे मन मोहूत करदा ऐ। इंयां गै सुन्ना तपी-तपियै गै कुन्दन बनदा ऐ ते चंदन घस्सी-घस्सियै गै अपनी सुगंध चक्खै खलारदा ऐ। भाए प्रकृति-पक्खरु तेरे मासूम-कोमल जीवन लेई सहारा बनियै आए, पर माऊ-बब्बै कोला त्यागी दित्ते जाने दे परैत इन्हें स्टेजें च पुज्जने तक बिचला समां जिस्सी—Transitional Period आखेआ जाई सकदा ऐ, तेरे आस्तै जरूर मता औखा रें'आ होग तो तां गै अस दुए लफजें च उस्सी कडें आला रस्ता आखी सकने आं।

इंयां तू संसार दे सामनै ने'आ सोह्ना पुल्ल बनियै आई जे रिशी-आश्रम च सब्बनी दियें अक्खीं दा तारा बनी गई। गौतमी, शारद्वत, अनुसूया, प्रियंवदा आश्रम दे रिशी कुलपति दे शिष्यगण, भ्यागत, हरण, पैछी, बेलां-बू'टें बगैरा सब्बनें तेरा स्वागत कीत्ता ते तुगी सांझ ते नि'गा प्यार दित्ता हा। एह् ममता ते प्यार इक्क-तरफा नेई हा। तू बी अपनियें भोलियें ज्योणपुने दियें खेड्डें, तोतलियें बोलियें ते अपने बे-मसाल रूप कन्नै सारें दा मन मोही लैता हा ते अपना प्यार भरेआ हिरदा उन्दे सब्बनी अगें खोली दित्ता हा। बेलें-बू'टें गी पानी, हिरणें-पक्खरुं गी चूग दित्ते बिना, तुम्मी ते अपने मुह् किश नेई ही पांटी। इसै लेई अपनियें सखियें-स्हेलडियें गी आखदी रौह् दी ही—इन्हें गी पानी देना भुल्ली जां तां अपने आप्पै गी बी भुल्ली जांङ्—“तत आत्मानमपि विस्मरिष्यामि।”

आश्रम दे कुसै बी बेल-बू'टें थमां फुल्ल खुंडुना, तेरियें नजरें च अन्याय हा, गुनाह् हा। इंयां करना उन्हें गी सताने दे बरोबर हा। जेकर कदें कुसै बी पक्खरु जां हरण बगैरा गी चोट-ठोकर लगदी तां ते तू परेशान होई जंटी ही ते जखमें उप्पर इंगुदी दा तैल लाइयै मलह्म-पट्टी करी दिदी ही। तां गै माधवी, प्रियंगु ते वन-तोषणी बगैरा बेलां तेरियां भैनां बनी गेदियां हां ते पक्खरु ते हरण बगैरा तेरे

आ। इंदे च घुले-मिले रौह्ने कन्नै, तुगी इक्क असीम नंद ते सकून मिलदा हा। इंयां तू कण्व रिशी दे आश्रम च बी सेही अर्थे च प्रकृति-देवी दी पुत्री बनी रें'ई ही। एह् तेरी इस प्रकृति मां दे प्रति निश्छल बफादारी दा चोखा सबूत हा, जिनन तुगी रिशी द्वारा अपनी पुत्री बनाई लैने तक साह्म्बी-सम्हैली रखेआ हा। तां गै कालिदास ने ठीक गै आखेआ ऐ जे असल च शकुंतला प्रकृति-देवी दी पुत्री ऐ। उन्न इक जगह पर, तुगी सम्बोधत करियै आखे दा ऐ जे बेलीं-बू'टें दे किसलय नै तेरे ओठें दी लाली दा निर्माण कीते दा ऐ तेरियां बा'ई उंदियां टालियां न, पर रिशी कण्व ने बी कुसै गल्ला दी कदें चिड़ नेई खादी ते तुगी प्रकृति-मां दी मानत सम-झियै गै तेरा पालन-पोषण कित्ता हा। इन्ना गै नेई तुगी इक्क सच्चे बब्बै दा प्यार ते ममता बी दित्ती ही। इंयां तू प्रकृति ते मानव दे बशकार सच्चे सरबंध सूत्तर दा कम्म करने च सफल होई गई। इन्ना गै नेई, अप्सरा मेनका मां ते रिशी विश्वामित्र दी पुत्री होने करियै, तू धरती ते सुगं दा नाता जोड़ने च इक्क बेमसाल कडी दा कम्म बी कित्ता। इसै लेई तेरा रूप ते शलैपा किश नराला ते बड़ा गै सन्हाकड़ा ते वन त्रिक्खे मन-मोहूनी कशश आले हे, जिन्दा ब्यान करदा-करदा कालिदास जनेह् आ म्हान कवि बी, हुट्टी गोआ हा। तां गै जिसलै राजा दुष्यंत नै तुगी पैहूली बारी दिक्खेआ हा तां ओ इक्कदम ब्र'वकी उठेआ हा ते उसदे मुहां दा चान-चक्क निकली पेआ हा—“अये लब्धं नेत्र निवर्णम्।” ओह्! मेरियें अक्खी गी इक्क असीम नंद ते शांति प्राप्त होई गई ऐ। से'ई होंदा जे एह् वाक्य दुष्यंत दे थाह् कालिदास आप्पै गै बोला करदा ऐ जिसदे कोल शलैपे दा वर्णन करने दा सारा भंडार मुक्की गोआ ऐ, पर उसदे नाटक दियां एह् अगें उद्धृत पंक्तियां उसदी एह् दलील पेश करदियां न, कीजे इयै ने'आ शलैपा धरती दे माह्नुणं कोल ते होई गै नेई सकदा, इसलेई उसदा पूरी चाल्ली तफसील कन्नै वर्णन करने दा ते सवाल गै पैदा नेई होंदा—“न प्रभातरलं ज्योतिरुदेति वसुधा तलात्।” रोशनी गी बी चकाचौंध करने आली एह् जोत इस धरती उप्पर कदें बी पैदा नेई होई सकदी।

इंयां उन्न म्हान कवि ने बी तुगी दिव्य रूप देइयै, तेरे रूप दा होर मता बखान करने आस्तै, अपनी असमर्थता जाह् र करी छोड़ी ही। जेकर सुगं दियें अप्सरें दा बी कवि ते लेखक वर्णन करी लैदे न तां कालिदास होरें इंयां आखियै, अपनी असमर्थता जाह् र की कित्ती? असल च, तेरे शलैपे दा वर्णन करदे-करदे खीर ओह् बी थक्की-जन गेदे से'ई होंदे न। शकुन्तला, भला राजा दुष्यन्त गी दिखदे सार गै तू उस्सी आत्म-समर्पन करने च की काह्ल कित्ती ही? तू इस गल्ला दी बी परवाह् नेई कित्ती जे उसदे च, किन्ना ओछापन ऐ, उन्न अगें गै किन्ने ब्याह् कित्ते दे न ते ओह् तुगी सच्चा-सच्चा प्यार बी देआ करदा ऐ जा नेई—बगैरा-बगैरा। तू कम-से-कम बाह् र गेदे अपने उस धर्म-पिता कण्व दी मान-मर्यादा ते

इज्जती दा ते ख्याल करना लोडचदा हा। तू कुसै दी परवाह्, नेई किच्ची ते अपनी भावुकता ते भोले-पन दी वजह कन्नै उसदे चक्कर च आई गई। तू इक्क बनू-वातावरण च पलने आली भोली-भाली कुड़ी ही ते ओह्, हा शैह्री-वातावरण ते राजनीति दे दाऽ-पेचें च पले दा गब'रू राजा। भिरी चजै आली गल्ल एह्, जे तू उसलै अपनी ते राजें कन्नै दुआ ब्याह्, करने आलिएं सारियें सोह्, नियों ज्वांटड़ियें दी एह्, शर्त बी कियां भुल्ली गई ही—“मयि जायेत यः पुत्रः सभवेत् त्वदनन्तरम्।” जेकर भेरे थमां पैदा होने आला पुत्र गै राज दा उत्तराधिकारी बनाया जा में तां गै तेरे कन्नै ब्याह्, करने आस्तै त्यार आं, नेई तां नेई। तेरे इस भावुकता भरे फँसले गी अस तेरे जीवन दा कच्चापना ते अनुभवहीनता आखी सकने आं। तां गै अगमें चलियै, जिसलै राजा विस्मृति दे कारण तुगी ठुकरांदा ते अपनिया सभा बिच सब्बनीं दे सामने तेरे उप्पर चरित्रहीनता दियां लांछनां लाइयै, तुगी उत्थुआं चली जाने आस्तै, मजबूर करी दिदा तां कवि कालिदास होर ठीक गै आखदे—“अतः परोक्ष्य कर्तव्य विशेषात् संगतं रहः। अज्ञात हृदयेष्वेवं वैरी भवति सौहृदम्।” एकांत च प्रेम दा सौदा, खास करियै दिक्खी-सुनियै ते भलेआं-परखियै करना लोडचदा ऐ। नेई तां अजनबी दिलें दा प्यार कदें-कदें दुश्मनी बिच बी बदली जंदा ऐ।

महाकवि दी इस कथनी बिच किन्नी सचाई ऐ—एह्, इक्क सार्वभोम सच्च ऐ। इत्थें तू महाकवि दियें नजरें च दुनिया भर दियें ज्वान-कवारियें कुड़ियें दी प्रतिनिधि ऐ। पर, इस घटना गी अस तेरे भागें दा खेल ते तेरे ते राजा दुष्यंत दा संयोग बी आक्खी सकने आं, की जे आखर तेरे ते दुष्यंत दे संयोग ने गै भरत-जनेह्, वीर-पुत्र गी जन्म देना हा। एह्, बी आखेआ जाई सकदा ऐ जे तू ते बिला शर्त राजा दुष्यंत अगमें आत्म-समर्पण करियै भारती नारी दी शालीनता, कुलीनता ते शुद्ध-चरित्रता दा गै परिचे दित्ता हा भारती नारी इक्क बारी जां पैह्, ली बारी, जिसी अपना पति मन्नी लैदी ऐ, उसदे कन्नै गै सारा जीवन बतांदी ऐ, भाएं किन्ने कष्ट भोगने पौन।

पर, जेकर अस इस्सी तेरी गलती गै मन्नी लैचे तां बी ठीक ऐ। इस्सै गलती ने तुगी राजे दे प्यार ते उसदे वियोग च उसदी तड़फाने आली याद ने तेरी सुधबुद बी भुलाई नित्ती, जिस लेई तुगी दुर्वासा रिसी दा शाप मिलेआ। जिसदे नतीजे दे तौरै पर, राजै तुगी भुलाइयै, ठुकराई दित्ता ते तुगी इन्नी जबरदस्त ठोकर लग्गी जे तेरा अहं जागी पेआ, जिन्न तुगी आदर्श नारी ते आदर्श मां दा रूप दित्ता। किन्ना जबरदस्त मोड़ आईगेआ हा तेरे जीवन च? इयां तेरे व्यक्तित्व गी उभारने च नियति दी गै महत्त्वपूर्ण भूमिका होई सकदी ऐ।

राजा दुष्यन्त कन्नै तेरा गंधर्व रीति कन्नै ब्याह्, जिस्सी प्रेम ब्याह्, बी आखदे न, होआ ते तू जिसलै गर्भवती बी होई गई, उसलै दुष्यंत अपनी राजधानी

गी चली गेआ। जंदे मौके तुगी विश्वास दुआने आस्तै उन्न अपने नां आली डूठी तुगी दिदे होई एह्, बैदा कित्ता हा जे जिन्ने अकखर इस डूठिया उप्पर लखोदे न, उन्ने दिनें दे अंदर तुगी राजधानी बलाई लैंग। हून एह्, प्रश्न पैदा होंदा ऐ जे भला दुष्यंत तुगी अपने कन्नै की नेई लेई गेआ? इसदा सिद्धा जवाब ऐ जे ओह्, तुगी कन्नै लेना चांह्, दा गै नेई हा। ओह्, तुगी टाल-मटोल ते ब्हानेबाजियां करियै उत्थें (आश्रम) गै छोड़ी जाना चांह्, दा हा। कियां लेंदा माऊ दा डर, रानियें दा त्राह्, ते तेरे अगमें बी झूठा पौना हा जे ओ क्वारा ऐ। इसदे विपरीत आश्रम च होर मता चिर रे'ई बी नेई हा सकदा की जे कुलपति दे औने दा मौका होई गेदा हा। जे उसदे उत्थें रौह्, दे ओह्, आई जंदे ते कन्नै तेरी प्रसूता होई जंदी तां उसदे आस्तै (राजे आस्तै) बड़ी मुश्कल पेश आई जानी ही। उसलै ते उन्न तुगी कन्नै गै लेना पौना हा। इसलेई उन्न इयै चंगा समझेआ जे उत्थुआं टाला गै लैओ।

ते पही उयै गल्ल होई। उन्न तुगी वायदे दे मताबक नेई हा सहेआ। नतीजे दे तौर उप्पर तू चिंता-ग्रस्त होई गई। निम्मोज्ञानी दे स्वा तेरे दिलो-दमाग उप्पर किश बी नेई हा। उन्हे मयूसी ते निम्मोज्ञानी भरे दिनें च इक्क दिन रिशी दुर्वासा होर बी आई टपके ते थहोआ पति दी जाद च कुड़ी-कुड़ी मरने दा शाप। भाएं एह्, रिशी दी बड़ी भारी गलती ही जे उन्न तुगी बिना सोचै-समझै झट्ट शाप दित्ता, पर इस कन्नै गै तेरे 'अहं' गी जागने दा अगमें चलियै मौका मिलेआ, जेह्, डा तेरे व्यक्तित्व दे विकास आस्तै नीऽ-पत्थर साबत होआ।

उद्धरा दा तेरे धर्म-पिता कुलपति कण्व होर बी, आश्रम बिच आई पुज्जे जिन्हें तेरे प्रेम ब्याह्, दी खबर सुनियै उसदा समर्थन करदे होए शीर्वाद दित्ती—“दिष्ट्या धूमाकुलस्य यजमानस्य दृष्टिरपि पावके एव आहुतिः पतिता।” एह्, सौभाग ऐ जे यजमान दियें अक्खीं पर, धुएं दा पर्दा छाने दे वावजूद उसदे हत्थें दी औह्, त अगगी बिच गै पेई ऐ। ते 'मुशिष्य परिदत्त विद्यौवाशी-चनीयासि संवृत्ता।' अच्छे शगिदें गी दित्ती दी विद्या आला लेखा तू मेरी चिंता दूर करने आली बनी गई ऐ।

इस थमां रिशी दे दिलै च छप्पी दी एह्, मनशा जे तुगी कोई खत्तरी (राजा) गै ब्याह्, पूरी होई गई ही। इस बारै च प्रसन्नता दिक्खियै स'ब्बै र्हान होई गे हे। किन्ना विशाल दृष्टिकोण हा कुलपति दा, जेह्, डा मजूदा वक्त दे माऊ-बब्बें गी बी र्हान करी छोड़दा ऐ।

इसदे तुरंत बाद रिशी नै तुगी राजा दुष्यंत कोल भेजने दा फँसला बी करी लेआ हा। शायद कुलपति चांह्, दे होने न जे राजकुमार भरत दा जन्म मैह्, लें बिच्च गं होयै तां गै चंगा ऐ। पर, रिशी दे इस फँसले कन्नै जियां सारा आश्रम कम्बी उठेआ हा। चारै-पासै खुसर-फुसर, मयूसी, निम्मोज्ञानी ते ख्वांह्, खनापन छाई गेआ हा। अनुसूया ते प्रियंवदा दी हालत ते ब्यान कोला बी बाह्, र ही। कीजे

उन्हेंगी शाप दी घटना चेतै ही, जिसकरी उंदे अंदर बड़ियां चु'ब्बां-जन लगा करदियां हियां ।

उसलै तू बी घट्ट परेशान ते निम्मोज्ञान नेई ही । तेरा दिल कदें स्हेलियें आसै, कदें आश्रम दे बेलें-बू'टें ते पशु-पकखरुणं पासै ते कदें दुष्यंत पासै खचोया करदा हा । तेरियां प्यारियां बेलीं — माधवी, बनतोषिणी बगैरा तुगी तड़फदियां ल'ब्बा करदिया हां । तां गै जाने मौके तू कदें द्रोड़ियै इक्क कोल जंदी ते गलै लगदी ते कदें दूई कोल । सारे आश्रम च रोन ते करलहू पेई गेदा हा । कनेहू आ कृष्णा भरेआ त स्नेह भरा वातावरण बनाई दित्ता हा तेरे प्यार ते स्नेह नै । उसलै तेरे उस संयमी ते म्हान योगी रिशी पिता दा दिल बी पिर्घली गेआ हा । ओहू, बी डुसकी-डुसकी रोन लगी पेआ हा । ओहू, आखन लगा हा—“शकुन्तला गी बिदा करदे मौकै असें जंगलबासियें दी एहू हालत होआ करदी ऐ, तां त्रिस्तियें दी केहू हालत होंदी होग ।” उसलै कुलपति नै तुगी सद्-ग्रैहणी बनदे दा जेहूड़ा उपदेश दित्ता हा ओहू, जकीनन गै सुनैहूरी अकखरें च लिखने जोग ऐ ते सौहरे जाने आली हर कुड़ी आस्तै म्हत्तवपूर्ण ऐ । इसदे कन्नै गै रिशी दा एहू, आखना जे इक्क पिता अपनी धी गी सब किश दिंदा, पर, भाग नेई देई सकदा, अवश्य गै उस प्यार-भावना भरोचे दे वातावरण गी झंझोलियै ल्हाई देने आला हा । कुलपति दे इन्हें शब्दें तेरे ते तेरिणं स्हेलडियें दे दिल कम्बाई ओड़े हे । भाणं रिशी दी इस कथनी च इक्क अकाट्य सचाई ही, पर, एहू बड़ी कौड़ी सचाई ही जेहूड़ी अगें चलियै रिशी दी भविष्यवाणी साबत होइयै, तेरे जीवन कन्नै जुड़ी गेई ही ।

उसलै तू उस निश्चल ते प्राकृतक प्यार-भरे वातावरण कोला हटियै, बनावटी प्यार दे राजसी वातावरण पासै बधी चली ही । ओहू, म्हान आश्रम उसलै चबकखा डुसकदा ते सिसकदा से'ई होआ करदा हा । उसलै पकखरुणं चूग खाना ते चैहू चहाना छुड़ी दित्ता हा । हरण ते बाकी जानवर बी खाना-पीना छोड़ियै निम्मोज्ञान हे । तेरियां भैणां बेलाने ते भ्रा बू'टे दुआस खड़ोते दे हे । तू जारदी ही ते पिच्छें सब डुसकी-डुसकी तुगी हत्थ ल्हाई-ल्हाई बिदा करारदे हे ते उन्ना चिर दिखदे रेहू, हे, जिन्ना चिर, तू उन्हें गी दूर गेदी बी ल'ब्बा करदी ही । डरेजी दे कवि वर्डसवर्थ नै लूसी दा निर्माण करने दी कोशिश जरूर कित्ती ही, पर, ओहू इक्क निक्की-ने'ई कवता राहें तेरे आला पूर्ण व्यक्तित्व दा निर्माण करने च कियां सफल होई सकदा हा । एहू सेहूरा कवि कालिदास दे सिर गै लगना हा । शंगार ते प्रकृति दे कवि कालिदास दे स्वा एहू कम्म कु'न करी सकदा हा ?

उसलै तेरी बिदाई दा ओहू समां तेरे लेई वरदान ते अभिशाप दोनीं दा संदेश लेइयै आया हा, ते इन्हें दोनीं दे मिश्रण नै तुगी भरत जनेहू, शूरवीर पुत्तरै दी मां बनाया हा । इन्ना गै नेई इयै खिन तुगी भारत दी आदर्श नारी बनने आस्तै, फल-वायक सिद्ध होआ हा ।

रस्ते च पानियै च डूठी दे पौने ते पौदे-सार गै इक्क मच्छी द्वारा उस्सी निंगली जाने दी घटना तेरे संघर्षशील जीवन आस्तै, अगें बधने लेई, इक्क होर मील पत्थर साबत होई ही । इस्सी भाणं दुर्वासा दे शाप दा परिणाम आखो, भाणं बिना बचारे कम्म करने दा कौड़ा नतीजा, भाणं बड्डें दे प्रति उपेक्षा-भाव दी सजाऽ । पर, जेकर इयां नेई होंदा तां राजा दुष्यंत दे दिलै दे कोनै च छप्पी दी औसतन पुरश जाति दी नारी दे प्रति एहू घृणा दी भावना जे नारी ते 'अशिक्षित पटुत्व' कन्नै भरी दी होन्दी ऐ, कियां बाहूर औदी ? आपू भाणं उन्न तेरे कन्नै झूठ बोलियै, तेरे कन्नै व्याहू करी लेआ हा, तेरे गर्भवती होइ जाने पर, तुगी झांसा देइयै, आश्रम च आसा-मेदा दे स्हारै छोड़ियै ओहू राजधानी च आइयै, अपने राजसी-जीवन च रुझी गेआ हा । बिंद तुंदे दौनीं दे चरित्रें दा मकाबला करचै तां सचाई आपू सामनै आई जंदी ऐ—इक्क निश्चल ते प्यार-भरे हिरदे आली भोली-भाली युवती ते दूआ झूठा ते छल-कपट भरेआ राजा । नारी-जाति उप्पर पुरश-जाति दी तरफा जुलमें दी इंतहा ही, उस जमाने च । बहु-विवाह प्रथा ने नारी गी सिर्फ भोग-विलास दी समग्री बनाइयै रक्खी दित्ते दा हा । पर, एहू सारियां चुनौतियां तेरे संघर्षशील व्यक्तित्व गी स्वारने आस्तै बरदान सिद्ध होइयां हां ।

जिसलै तू पति कोल जा करदी ही तां तेरे दिलै च किन्ने प्यार-भावना दे सुनैहरे मैहल बने होडन, किन्नियां हिरख-प्यार दियां सीरां, तेरे दिलै च कुर्जन लगी पेइयां होडन ? किन्ने उच्चे अरमान ठाठां मारा करदे होडन तेरे दिलै च ? किन्ने लाहूमे ते रोहू-रोस्से अपने हिरदे च छपैली रक्खे दे हे तू, जेहूड़े किट्टे गै कुतै, एकांत च मिलियै तू उसदिया गोदा च आपू पाइयै अपने दिलै गी हल्का करने दे सुखने दिक्खा करदी ही तां जे उस्सी पता लगै जे नारी दा हिरदा, किन्ना सच्चा-सुच्चा ते प्यार-भरेआ होंदा ऐ, अपने पति आस्तै । उसदे च सौ रोहू-रोस्से होने दे बावजूद, अपने पति आस्तै समर्पण दा भाव गै होंदा ऐ ।

इयां तू ओहू लम्मा पैंडा तै करियै बुआ गौतमी ते कुलपति दे प्रधान शिष्य शारद्वत कन्नै दुष्यंत दे मैहलें दे दुआर उप्पर पुज्जी गेई ही । अंदर सलाहू होई ही जे कुलपति कण्व दे आश्रम थमां कण्व हुंदे शिष्य ते भैण गौतमी दुआर उप्पर आइयै सरकार दे दर्शन आस्तै, फरियाद करा करदेन । राजे ने सुनदे-सार गै तुसंगी राज-दरबार च सही भेजेआ । तू राज-दरबार च पुज्जियै उस राजे दा, जेहूड़ा के आश्रम च तेरे कन्नै घुली-मिलियै रे'आ हा, ठाट-बाट दिक्खियै दंग रे'ई गेई । उच्चे सुनैहरी हीरें ज्वाहरातें कन्नै चम-चम करदे सिंहासन उप्पर नेकें किस्में दे शंगारै नै सज्जे दा राजा, जिसदे सिरै उप्पर बे-मझाल कीमती रत्नें दा चमकदा छत्तर ते चबकखै सज्जे-धज्जे दा सारा दरबारी अमला-फैला, सब तेरियें अक्खीं सामने इक्क अद्भुत दक्ख उपस्थत करा करदे हे, पर, तू उसलै अजीब जनेही घुटन-जन मैहूस करन लगी ही । उसलै सिंहासन उप्पर बैठे दा

ओह् राजा दुष्यंत तेरे ने रंगरलियां मनाने आला प्रेमी दुष्यंत नेई हा, बल्के भारत दा सम्राट दुष्यंत हा। इसलेई तू अपने-आपे च समटोआ करदी ही ते आपूं गी, उसदे मकाबले च बड़ा निकका समझा करदी ही। तू सोचा-रदी ही—कुत्थें एह् म्हान सम्राट ते कुत्थें में आश्रम दी सिद्धी-सादी रिशी कन्या? तेरे अंदरा दा किश बोला करदा हा—“चल इत्थुआं दा। इत्थें प्रकृति दा ओह् सभावक वातावरण नेई ऐ। इत्थें तें राजसी ते बनौटी ठाट-बाट ऐ। चल मना इत्थुआं!” “पर-पर में कियां जां?” तू जवाब दित्ता हा, अपने-आपे गी आपूं गै।

“मेरे ढिड्डू च ते राजे दा बच्चा ऐ, भारत दी परजा दी बेश-कीमती मानत। इसी साह् स्त्री-सम्हैली रक्खना ते मौका औने उप्पर देसै गी सौंपना मेरा फर्ज ऐ, अबलीन फर्ज।” एह् सोचदे गै तेरे मुंहां दा ओह् अंदरा दी उथल-पुथल ते घुटन, चीख-जन बनियै बाहर औने गी छटपटाई उट्टी ही, पर तू उसलै, बड़ा संयम कन्नै कम्म लेइयै, उस उप्पर काबू पाई लेआ हा।

राज-दरबार बिच पुजदे गै शारद्वत ते गौतमी ने राजा गी उसदी मानत (तुगी) सौंपने दी घोशना करी दित्ती ही। उसलै तेरे हिरदे च प्यार दी उत्सुकता दे समुन्दर ने किन्नियां ठाठां मारियां होडन? एह् तुएं दस्सी सकनी ऐं, पर, एह् घोशना सुनदे गै राजा दंग रेई गेआ हा—“एह् ते मेरी पत्नी नेई ऐ। में ते कदें बी रिशी आश्रम च जाइयै, कदें कोई ब्याह् नेई हा कित्ता, कदें बी नेई। राज-दरबार बिच आइयै इयै-नेइयां गल्लां करनियां शाही-शान आस्तै अपमान-कारक होंदियां न।” राजे खीरले लफज तलख होइयै आखे हे, जिदी गौतमी ते शारद्वत दौनीं दे मनें उप्पर बड़ी गै कौड़ी प्रतिक्रिया होई ही।

राजे दा एह् जवाब सुनियै, सब्बनीं दे चर्जे दा ठकाना नेई हा रेआ। स्थानी-ब्यानी ओह् बुआ गौतमी शरमा कन्नै पानी-पानी होई गेई ही। शारद्वत सोचै जे चुल्लू-भर पानी होयै तां डुब्बी मरां।

इन्नै च राजे ने शिष्टाचार दे नातै, कुलपति हुंदा कुशल-समाचार पुच्छेआ। उससलै अपने अंदरै दा सारा ‘अहं’ ते हौसला समेटियै, तू बोली पेई ही—इक्क अधिकारपूर्ण लैह् जे कन्नै—“केह् गल्ल ऐ, तुस मिगी भुल्ली गे? तुसैं कुलपति दे आश्रम च मेरे कन्नै प्रेम-ब्याह् नेई हा कित्ता?” राजा एह् सुनियै तोबा-तोबा करदा होआ बोलेआ—“राम-राम, रिशी आश्रम च जाइयै, रिशी-कन्या कन्नै में ब्याह् कित्ता। कदें नेई। एह् गुनाह् में कदें नेई करी सकदा हा। ते फही में ते अगमें गै केई ब्याह् कित्ते दे न।” एह् आखियै ओह् अपना मत्था खुर्कन लगा, कुसै भुल्ली-बिसरी जाद गी ताजा करने आस्तै।

उसलै तू उसी अपने प्रेमी-जीवन दे केई प्रसंग सुनाए ते उसी चेता नुआने दे जतन कित्ते हे, पर, राजे गी तेरियें दलीलें उप्पर रोह् ते चिड़ लग्गी की जे सभा च बैठे दे सभासद इक्क दुए गी सारतां करान लगी पेदे हे। मगर सेई होंदा

जे राजा उसलै अपने झूठे उप्पर जरूर पर्दा पाने दा जतन करारदा हा। पर, जिसलै तू आखेआ जे “तेरी संतान बी, मेरे गर्भ बिच ऐं, तां राजे गी इक्क परसीना औन लगा ते दुआ जान लगा हा। उस दिएं अक्खी अगमें तिरमिरे उड्डरन लगे है जिं दे च उसी अपने उत्तराधिकारी दे केई चेहरे लिशकदे-चमकदे लंबदे सेई होए हे। ओह् लाजवाब होइया हा, किश चिरै आस्तै। पर, उन्न ते अपने झूठे उप्पर पर्दा पाना हा कुसै कीमत उप्पर बी। उसलै उसदे सामनै केई प्रश्न बिच्चुएं आला लेखा डंग सुआइयै खडोते दे हे—“उत्तराधिकारी दी लोड़, तेरे अगमें बोले दे झूठ गी बचाना, सभासदें, रानियें ते राजमाता अगमें अपने आप गी सच्चा-सुच्चा साबत करना।” पर, ओह् केह् करदा। अपने आप्पै गी आपूं बनाएदे जालै च फसे दा मैह् सूस करादा हा हा। इसलेई कोई फँसला नेई हा करी सकारदा तुगी माकूल जवाब देने आस्तै। पर, खीर ओह् बोली गै पेआ—“में तेरे कन्नै कदें ब्याह् नेई हा कित्ता। बेह्तर ए जे तू इत्थुआं दा चली जा।” एह् सुनियै तू तिलमलाई उठी ही। तू अपनी दूई दलील पेश करदे होई आखेआ—“में तुसैं गी ओह् नशानी दस्सी सकनी आं, जेह् डी तुसैं मिगी औंदे मौके दित्ती ही।” राजे ने सिर ल्हाइयै नशानी दिक्खने दी हाम्मी भरी ते तू खुश-खुश होइयै डूठी आली औंगली उप्पर दूए हत्थें दियां औंगलियां मलनियां शुरु कित्तियां हां। तेरे मुं हैं दा इक्कदम ‘ओह्!’ निकली गेआ हा। “मेरी डूठी कुतै डिग्गी पेई।” एह् आखदे गै तेरा परसीना निकली गेआ हा ते दिल कंबी पेआ हा, तेरिएं अक्खीं अगमें न्हेरा छाई गेआ हा। सारा शरीर सुन्न होई गेआ हा। उदररा दा राजा गड़ाका मारियै हस्सी पेआ हा ते सारे सभासद खुसरपुसर करन लगी पेहे। तू भलखावे ते शर्म कन्नै मिट्टी होई जारदी ही ते सोचारदी ही जे धरत फट्टी जा तां उस च समाई जां, उसै लै। राजा गम्भीर होई उट्टेआ हा—“ओ रिशी-कन्या, इत्थुआं दा चली जा इसै लै। इसै च बेह् तरी ऐ। इयां कुसै गी जबरदस्ती पति नेई बनाया जाई सकदा। इयां ते वेश्यां बी नेई करदियां। मेरे चरित्तर गी लांछन नेई ला। में ते भारत दा सम्राट आं। में इयै नेह् गिरे दे कम्म कदें बी नेई करदा। जनानियें दा एह् आम सुभास ऐ जे ओह् बगैर पढे बी चलाक होंदियां न। तां गै उन्हें गी ‘अशिक्षित पटुत्व’ होने दा तगमा लग्गे दा ऐ। तू बी इस गल्ला दा अपवाद नेई ऐं। मिगी ते सेई होंदा ऐ तू कोई दुश्चरित्र औरत ऐं। चल हट-इत्थुआं दा, इसै बेलै।”

राजे दुष्यंत दे मुंहां दा तेरे पिच्छें सारी नारी जाति गी एह् तोह् मत ते लांछन सुनियै तेरे ‘अहं’ गी गम्भीर चोट लग्गी ही। तेरा स्वाभिमान चीखी उट्टेआ हा ते बाहर निकलने आस्तै तड़फी पेआ हा। तू चंडी-रूप होइयै राजे गी झूठा, लम्पट, छली कपटी बगैरा-बगैरा आखी जा करदी ही। तू रोहै ने विजली आंगर बाहर निकली आई ही। राजा ते उसदे सभासद पत्थर दियां मूर्तियां-जन

बने दे ल'ब्वारदे हे । उसलै दुष्यंत, राजा होइयै बी तेरे निश्छल ते म्हान चरित्तर दे सामने वामना ल'ब्वारदा हा । उन्न इक्क निश्छल, भोली रिशी-कन्या गी झूठ-सच्च बोलियै अपने चंगुल च फसाइयै खराब कित्ता हा ते राजधानी च कुसै दे बी कन्नै तक एह् गल्ल नेई ही पुज्जन दित्ती ते हून उससी ठुकराइयै अपनी लंपटबाजी ते क्रूरता दी इक्क होर घृणत तसबीर पेश कित्ती ही । ते पही उन्न नां उस समें दे म्हान रिशी कुलपति कण्व ते नां गै राजमाता दी कोई परवाह् कित्ती ही ते पही एह् सब करियै बी उन्न तुगी उल्टे झूठे लांछन लाइयै ठुकराई बी दित्ता हा । इस थमां ब'ह् उसदी होर केह् नीचता होई सकदी ही ? इस थमां उल्ट तेरा चरित्तर होर उज्जवल सुच्चा ते उच्चा होई गोआ हा । तू भारत दियें सन्नारियें दी पंक्ति च आई खड़ीती ही । इसै लेई तेरा सिर उच्चा हा ते राजे दा सिर नीमा होई गोदा हा ।

जिसलै तू बाहर निकली तां गौतमी ते शारद्वत बी बाहर आइयै, रिशी आश्रम पासै चली पे हे, उसलै तू बी उंदे पिच्छे-पिच्छे जान लगी पेई ही, पर, उन्हे दौनीं तुगी खरी-खरी सुनाइयै, उत्थें गै रौह् ने आस्तै मजबूर कित्ता हा । एह चुनौती, तेरे आस्तै बड़ी गै ओखी ही । इक्क पासै कंडे ते दूए पासै ठोकरां । कनेही संकट दी घड़ी ही, ओह् तेरे आस्तै ?

पर, तू इस तथाकथित तत्थ गी चुनौती देइयै अगगै बधने गी तयार होई पेई ही । तू चली पेई हो कुसै अज्ञात दिशा पासै । बशक्क तेरियें अक्खीं च अत्थरुं ते ढिड्डै च बच्चा हा, 'पुरुहूत-वंश' दी मानता । बा, दिलै च, इन्हे चुनौतियें दा जवाब देने आस्तै, इक्क अटल हिम्मत बी ही । उसलै तू इक्क पासै, बुआ गौतमी ते शारद्वत गी अलबिदा आखी ते दूए पासै राजे गी प्रणाम कित्ती ते चली पेई ही इक्क अज्ञात मंजल पासै । तेरी अवस्था दिक्खियै उसलै जड़-चेतन स'ब्वनीं दा दिल कंबी पेआ होना, तां गै तेरी मां सुर्गा दा द्रौड़दी उत्थें आई पुज्जी ही । शुकर ऐ जे कुतै उसदा दिल बी पिर्छेलेआ हा । उन्न तुगी उत्थुआं दा चुक्कियै मारीच रिशी-दे आश्रम च पजाई दित्ता हा । इयां प्रकृति दी लाडली बेटी पही उससै दिया गोदा आई पुज्जी ही, जित्थें तू ठंडा साह् लेआ हा । तू उससी ठुकराइयै राजसी वैभव पासै, खचोइयै चली पेई ही तां गै शायद तुगी इन्ने कष्ट झेलने पे हे । से'ई होंदा जे डूठी गुम्मने दी घटना कोला लेइयै, रिशी मारीच दे आश्रम तक औने तक दा समां, तुगी प्रकृति पासेआ फटकार दी सजा दा समां हा । पर, तू बी केह् करदी तेरे ढिड्डै च पुरुहूत वंश दी मानता ही । उससी सन्हैली रक्खना ते उसदे पिता गी सौंपना तू अपना अबलीन फर्ज समझदी ही ।

मारीच रिशी दे आश्रम च तुगी उयै नि'ग्गा हिर्ख मिलेआ जेह्ड़ा तू कण्व रिशी दे आश्रम च प्राप्त कित्ता हा । रिशी हुंदे शिश्यें, तुगी बक्खरी कुटिया बनाई दित्ती ही ते तेरे आस्तै रजाना कंद-मूले दा प्रबंध करने दी जम्मवारी बी

अपने सिर लेई लेदी ही । किश दिनें परैत, उससै आश्रम च तेरे भरत ने जम्म लेआ । रिशी मारीच ने उससी शीरबाद दित्ती ही । इत्थें गै तू उसदे भावी जीवन दी नींऽ रक्खी ही, उससी बी बनाया हा ते पढ़ाई-लखाइयै शस्त्र विद्या च बी प्रवीण कित्ता हा । हून तेरियें अक्खीं च नां अत्थरुं हे ते नां निम्मोज्ञानी, सिर्फ कर्तब्व-भावना, कर्मठता ते साहस दी झलक होंदी ही । हून तू अबला नारी नेई, सबला ते आदर्श मां ही, जिसदे उप्पर भारत दे भावी सम्राट दे पालन-पोषण ते शिक्षा-दीक्षा दी जम्मावारी ही । तू हून प्रकृति दे बेल-बूटें, पशु पक्खरुं दी देख-भाल करियै गै अपना मन नेई पतियांदी ही, बल्के उसदे कर्न इक्क म्हान व्यक्तित्व दे सृजन च रुज्जी गेदी ही । हून तेरा कम्म किश औखा जरूर हा, पर, एह् करदे होई तेरी छाती खुशी कन्नै फुलदी ही, तेरियें अक्खीं च इक्क खास मसरंत दे अत्थरुं औन्दे हे ते तेरे हिरदे च माऊ दी अनसंब सीर कुरजदी ही । उसलै, तेरी दृढ़ इच्छा-शक्ति ते कर्तब्व-निष्ठा दिक्खियै, मारीच आश्रम दे रिशी बी धन्न-धन्न करी उठदे हे । प्रकृति दी कोमल कली गी उसलै, परिस्थितियें दे थपेडें किन्ना शक्तिशाली बनाई ओड़े दा हा ? तेरे अंदर दा नारीत्व जागियै सारियें चुनौतियें दा जवाब देआरदा हा । आत्म-निर्भरता ते आत्म-विश्वास दा तेज तेरे चेहरे उप्पर चमकारदा हा । तेरा सीमत नारीत्व हून उस मातृत्व दे विशाल बजोग च अपनी सुध-बुध गबाइयै दुर्वासा-जनेह् क्रोधी रिशी दे आगमन दे बारे च खबरदार नेई होइयै, उससी उपेक्षत करने आली शकुन्तला, हून अपने पैरें उप्पर खडोइयै दस्सैं गी सहारा देने दी शक्ति रखदी ही । हून तू सच्च गै अपने म्हान नारीत्व उप्पर अधारत मातृत्व गी अपनाइयै पुरुश दे 'अह' गी चकनाचूर करी दित्ता हा हा । तू अपनी कर्मठता कन्नै दस्सी दित्ता हा जे नारी जिसलै जागियै शक्ति-रूप च उ'ब्वरी औंदी ऐ तां पुरुश दी हर चुनौती दा सामना जां मकाबला करी सकदी ऐ । भाएं तू अपने इस नमें आश्रम बिच रौह्दे होई पुरुश जाति दे विरुद्ध कदें बी मुंहां-दा कोई लफज नेई कडुहेआ, पर, तेरे कार्य-व्यवहार नै साबत करी दित्ता हा जे नारी जागी जा तां पुरुश दे सहारे दै बगैर बी सब किश करी सकदी ऐ ।

शकुन्तला ! तू अपने बेटे भरत गी धनख-विद्या ते तीरंदाजी दे जेह्ड़े हुनर सखाले हे, उस थमां तेरी धनख-विद्या प्रवीणता दा पता चलदा ऐ । जिसलै तू उससी इस विद्या दा भ्यास करांदी ही तां ओह् पुछदा होंदा हा—मां मेरा पिता कुंन ऐ ? तू आखदी ही—में तेरा पिता आं । ओ पही पुछदा—मां, दस्स मेरा गुरु कुंन ऐ ? तू जवाब दिदी, तेरा गुरु बी मियें । जागत पही पुछदा—मां पिता तू ऐं, गुरु बी तू ऐं ते मां बी तू ऐं ? तू झट जवाब दिदी—सब किश मियें ।

तू आखदी—बेटे, तेरा निर्माण में करना ऐ, तुगी वीर ते म्हान बनाना ऐ । मेरे स्वा होर कुंन ऐ तेरा ? लै पकड़ धनख, मार नशाना, ते जाद रक्ख, बैरियें गी कदें माफ नेई करेआं । उन्हे गी जरूर सजाऽ देआं । इयां तू अपने पुत्तर गी

इन्ना निडर बनाई दित्ता हा जे ओह् खीर शेर दे बच्चे कन्ने खेढन लगी पेआ हा । तू उसदे आस्तै शेर दे दौ बच्चे दा प्रबन्ध बी करी दित्ता हा । भरत उंदे कन्ने रोज खेढदा हा, उंदे ने घुलदा हा उंदे दंद पकड़ियै गिनदा हा ते उंदे ने नचदा-कुददा हा । ओह् बी उसदे दोस्त-जन बनी गेदे हे । एह् सब रिशी दे शीरबाद ते तेरी शिक्षा दा प्रभाव हा ।

धनख-विद्या सखालदे मौके तू उससी तीरंदाजी दे केई दाऽ-पेच दस्से हे । तू केई बारी अपने मत्थे, मूडे ते सिरै उप्पर नशाना रक्खियै, भरत कोला नशाने लुआए हे । इन्ने तक जे केई बारी तू भरत गी अक्खी मीटियै नशाना लाने गी बी आखेआ । ओह् बी इन्ना तेज निकलेआ जे हर किस्म दी तीरंदाजी बिच उससी पूरी-पूरी कामयाबी मिली ही । ते तू इक्क दिन उससी इस विद्या च पास घोशत कित्ता हा । सच्च गै शकुन्तला, तू किन्नी म्हान ही, किन्नी आदर्श मां ही ते किन्नी वीर नारी, जेह् डी 'वीर-प्रसू' गै नेई बल्के वीर माता ते इक्क आदर्श गुरु बी बनी गेई ही । भारती गै नेई, विश्व-इतिहास बिच बी शायद तेरे-जनेई कोई नारी होई होग—जां अगो होग ।

एह् ठीक ऐ जे भरत दे आदर्श व्यक्तित्व दे निर्माण च रिशी मारीच दी शीरबाद दी अहम भूमिका ही, पर, तेरी बे-थक्क साधना दे बगैरा नि'री शीरबाद बी केह् करी सकदी ही ? ते तू अपने बच्चे गी दलेर नेई बनाए दा होदा तां शेर दे खुल्ले दे बच्चे गी ते दूर बद्धे गी दिक्खियै बी करलान लगी पाँदा । उंदी भँकर गर्जना उसदा दिल कंबाई दिदी । गल्ल साफ ऐ जे भरत गी दलेर बनाने च मूलरूप च तेरी शिक्षा, तेरी बुद्ध, तेरी साधना गै कारण ऐ ।

उद्धर जिसलै राजे गी पुलसा आलें, मशौहरे थमां पकड़ोइदी राजे दे नां आली डूठी थहोई तां उसदी विस्मृति इक्कै झटकै कन्ने भंजोई गेई ही । उससी तेरे कन्ने प्रेम-ब्याह् दी ते तुगी ठुकराने दी सारी सारी घटना जाद आई गेई । चलचित्र आला लेखा सब किश सिलसिले-वार उसदिये अक्खीं दे अग्गुआं गुजरन लगी पेआ हा । एह् बी होई सकदा ऐ जे राज-घराने च ते प्रजा-जनें च उसलै राजे दे उत्तराधिकारी दा प्रश्न चर्चा दा विशे बनी गेदा होयै कीजे राजे दिये पैह् लिये रानिये चा कुसै दे बी अदू तक जागत नेई हा होआ । खास करियै राजमाता इस बारे च मती चिंतातुर होई गेदी ही । इसलेई राजा हून कियां आखदा जे ओह् डूठी उसदी नेई ऐ । इक्क मच्छियै दे दिडु उस डूठी दे जाने दी घटना गी भाएं ओह् रहस्स दा नां दिदा, इस सच्चाई थमां ते इन्कारी नेई हा होई सकदा जे उन्न डूठी जरूर कुसै गी दित्ती ही । खीर, उससी मन्तने पेआ जे इक्क बारी उन्न शकुन्तला नां दी कण्व दी धर्म-पुत्तरी गी एह् डूठी बी दित्ती ही ते उसदे कन्ने उन्न प्रेम-ब्याह् बी कित्ता हा । फही केह् हा राज-मैह्ले च ते राजधानी दे हर घर च चर्चा शुरू होई गेदी ही—'मड़ो कन्हेआ बे-दर्दा राजा ऐ, जिन्न नेई शैल ते

गर्भवती जनानी गी अपनी बनाइयै बी त्यागी दित्ता । किन्ना पाप कित्ता ऐ राजे ने ? किन्ना परद्ध ऐ ? कम-से-कम अपने बैस दा ते ख्याल करना हा । हून कु'न उत्तराधिकारी बनग इस गद्दी दा ? बगैरा-बगैरा ।

राजा अपने गुप्तचरें कोला अपने बारे च अपने बरखलाफ एह् चर्चा सुनियै कंबी पेआ हा । ओह् खान-पीन, सौन-बौहन सब भुल्ली गेआ हा । उसदा सारा 'अह' हून चकनाचूर होई गेआ हा । अशिक्षत पटुत्व दोष आली शकुन्तला उससी हून देवी ते आदर्श नारी मलूम होआ करदी ही । पर, हून ओह् उससी कियां मिली सकदी ही ? उसदी सारी सी० आई० डी० ते बाकी अमले-फैले दियां कोशशां, फेल होई गेइयां हां ते सारे जैत्तर-मैत्तर ते जोतश बी झूठ साबत होई गे हे । राजे दे सामने परेशानी ते निम्नोझानी दे स्वा किश नेई हा । सारा राजघराना चिंता च डुब्बे दा हा । तेरे कन्ने कित्ते दा जुल्म उससी सप्प-जन बनियै फिन सुआइयै औंदा ल'ब्बा करदा हा ते उद्धरा दा उत्तराधिकारी दा प्रश्न बी बिच्चू दे डंगे आला लेखा सामने खड़ोते दा हा । राजा हून करै तां केह् करै ? समाज अगै केह् मुंह् दस्सै ? परमात्मा कोला कियां सि'ज्जै ? कुलपति ते उसदे शिश्य रिशिये दे कियां सामने होई सकदा ? नारी जाति उससी हून कियां प्रजापालक समझग ? नेहियां नेकां चिंतां उससी पलै-पलै सताऽ करदियां हां । इन्हें चितें च डुब्बे दे गी उससी इक्क दिन राजा इन्दर पासेआ इक्क लड़ाई च शामिल होने आस्तै सनेहा आया हा ।

युद्ध जित्तने दे परैत उन्न मारीच रिशी दे आश्रम बिच्चा दा होंदे होई अपनी राजधानी परतोने दा फैसला कित्ता । परमात्मा दी मर्जी, उसदा रथ तेरी कुटिया दे पासेआ गै गुजरेआ हा । फही केह् हा, भरत दे दौयै शेर द्रौडी पे हे ते उंदे पिच्छे-पिच्छे धनख लेइयै आपू भरत बी उत्थे जाई पुज्जा हा । इन्ने चिरै च राजे दे रथे दे घोड़ें शेरें दलकी ओड़े दे हे । रथ त्रुट्टी भज्जी गेदा हा ते सूत इक्क पासै पुट्टा पेदा हा । राजा र्हान-परेशान हा । भरत ने औंदे सार गै उसदे उप्पर बाणें दी बर्खा शुरू करी दित्ती ही । राजा सिर्फ अपने बचाव दा रवेइया गै अपना करदा हा कीजे उस बच्चे आस्तै हमले दा रवेइया अपनाणा ओह् अपनी बे-इज्जती समझदा हा । पर, भरत अपने तीर चलांदा रे'आ हा, जिस कन्ने राजे दा धनख बी नकारा होई गेआ हा । भरत दी खुशी दा ठिकाना नेई हा रे'आ । उन्न आइयै राजे गी बालें दा पकड़ी लेआ हा । राजा बच्चे दी वीरता ते तीरंदाजी दिक्खियै र्हान हा । उन्न उससी पुच्छेआ—तू कोह् दा जागत ऐ ? भरत ने जवाब दित्ता—'पुरुहूत वंशी राजे दा ।' राजे गी सुनियै उत्सुकता होई । इन्ने च तू बी उत्थे आई पुज्जी ही कीजे तू शेरें दी गर्जना सुनी ही । तू औंदे सार गै राजे गी पछानी लेआ हा । घोड़ें गी ते सूत गी पुट्टा पेदा ते रथ गी टूट्टे-भज्जे दा दिक्खियै ते कन्ने भरत कोला राजे गी पकड़ोए दा दिक्खियै तेरे चर्जे दा ठकाना नेई हा रे'आ । र्हान होइयै तुरता नै औंगली अपने मुहां च पाई ते भरत गी रोहे ने आखेआ हा—'छोड़ी दे

इन्हें गी ।” भरत ने करलाइयै जवाब दित्ता हा—“मां, तुर्यै आखनी जे बैरी गी सजाऽ देनी चाई दी ऐ । एह् मेरा बैरी ऐ । में इस्सी जरूर सजाऽ देनी ऐ ।” एह् सुनदे गै तूं करलाइयै भरत गी आखेआ हा—“एह् तेरे बैरी नेई पिता न । छोड़ी दे इन्हें गी, नेई तां पेआ मेरा धप्पड़ ।” भरत दा हत्थ ते बिन्द ढिल्ला ते होआ हा, पर, उन्न तुगी तां बी पुच्छेआ हा, “मां तूं ते आखनी जे तुर्यै, मेरा पिता बी ऐं ।”

“नेई तेरे पिता एह् न, में सिर्फ मां गै आं ।” तूं इक्क बारी उस्सी फही डांटदे होई आखेआ हा । भरत दा हत्थ यकदम राजे दे बालें उप्परा हटी गेआ हा । राजे दिये अकखीं च अत्थरुं आई गे हे । ओ शर्म ते पछतावे कन्नै पानी-पानी होआरदा हा । उन्न झट तेरे पैरें उप्पर अपने चमचमांदे मुकट आला सिर टकाई दित्ता हा—“देवि, माफ करी दे, में गुनाह् गार आं; मता गै गुनाह् गार ।” तूं बिंद पिच्छे हटियै चुपचबीती खड़ोई गेई ही ते तेरिये अकखीं चा बी टप-टप अत्थरुं बगी जारदे हे । दिक्खने-जोग दक्ख हा ओह् । इक्क दे अत्थरुं पछतावे दे हे ते दुए दे माफ-भाव दे । पर, तेरी म्हानता गी फही दाद देनी पौंदी ऐ जे तूं राजे गी नां ते कोई लाह् मा दित्ता हा ते नां गै कोई रोह्-रोस्सा प्रगट कित्ता हा । किन्नी म्हानता ही तेरे च, जेह्ड़ी तुगी म्हेशां आस्तै, अमर करी गेई । तूं उसलै बी, राजे दे अगें आत्मसमर्पण गै कित्ता हा ते उसदी मानत सौंपी ही । पर, तेरे व्यवहार ने उस राजे गी गै नेई सारी दुनिया गी दस्सी दित्ता हा जे नारी अपनी कर्तबब-निश्ठा दा बर्त लेई लै तां ओह् सब किश करियै दस्सी सकदी ऐ, कीजे उसदे च अद्भुत सृजन शक्ति होंदी ऐ । अज्ज भारती इतिहास दे ओह् पृष्ठ, जित्थे तेरा वर्णन ऐ, साढ़े सामने अमर होई गेदे न । ओह् अकखर साढ़े आस्तै काले नेई न, बल्के सुनैह् री न । शकुंतला, भाएं तूं अपनी मसाल आपूं ऐं, पर, फही बी तेरे-नेइयें नारिये उप्पर तेरे भरत दे भारत गी बड़ा गर्व ऐ ।